



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma : Tir Yimym

tiryimym@aolima

tir yimym

TAPAK 7

Kejriwal-i Delhi nung tzümetsüng tensa atema senden ayong

Prayuth Chan-ocha politics nungi anisüngzöker



VOL. XX NO. 270 (ADOK 270) DIMAPUR YANGTEPNÜ (THURSDAY) CHITENI (JULY) 13, 2023 ₹ 5.00

## Dimapur-Niuland-Kohima lenmang yanglushiogo

**Dimapur, July 12, 2023 (Agencies):** Ghotovi/Zhadima ajanga Dimapur-Niuland-Kohima lenmang yanglushiogo aser senzusenbong asütsü akok ta Ghotovi Village Council (GVC)-i metetdaksüogo.

July 5 nungi 10, 2023 tashi Niuland Deputy Commissioner Sara Jamir-i Executive Engineer PWD (R&B) Inahoto aser J.E. Vinoto Zhimomi nunger den yaritepa Niuland nung zero point nungi Dimapur Division kübok kilometer 16 tashi nung lenmang mejungi alibatem yanglushiogo ta GVC-i sangdong ka nung ashi.

Iba lenmang nung side drain aser lenmang anasa alliba arem merüktettsü atema Nagaland sorkari emergency funds agütsütsü mepishir kechiyong Kohima nungi Bokajan tashi lenmang ya Kohima, Tseminyu,

Wokha, Zunheboto aser Tuensang district tem atema kanga tongtipang lir ta village council-isa metetdaksü.

State sorkari iba lenmang ya "All Weather Road" ka ama anepalutsüla kechiyong National Highway 29 nung lendong atalokdang Naga nungeri timtem kanga ajurur, ta GVC-isa metetdaksü.

July 4, 2023 nü Dimapur nungi Kohima tsüingda Pakala Pahar nung lung anenzüka aluba lendong atalokba sülen gari tila ajak 7th Mile Chümoukedima Junction-Sukhovi-Pimla-Mhainamtsi-Punglwa-Jharnapani-Medziphema leni senzüdaksü.

Ajisüaka iba lenmang ya kanga talang aser majungba ajanga senzusenbongertemi mapang talila endokba dang masü saka timtem jenti ajurur.

## Manipur nungi arurtem Aadhaar nung address memelenshitsu

**Dimapur, July 12, 2023 (TYO):** Chümoukedima district kübok Medziphema nung Aadhaar operators aser Common Service Centres (CSC) operators dang Manipur nungi arua Nagaland nung jenoka aliba Kuki nunger address memelenshitsu metetdaksüogo.

"Manipur nungi aruba Kuki nunger kari CSC operators dang parnok Aadhaar nung address melenshitsu atema tasüingdangi aruba osang angazüker" ta Medziphema nung additional deputy commissioner P James Swu-i ashi.

"Medziphema sub-division nung aliba Aadhaar operators aser CSCs ajanga Aadhaar documents nung address memelenshitsu tetuyuba agütsür kechiyong iba ajanga tarutsü nung timtem ajurutsü" ta ADC-isa metetdaksü.

Iba tetuyuba indang shidi ya Medziphema jila nung Kuki nunger chairman aser Molvom,

Maova, Sirhima, Khaibung o Bungsang village council chairman tem dangi yokogo.

Taküm June ita Chakhroma Public Organisation (CPO)-i Chakhroma Youth Organization (CYO) aser Chakhroma Women Organisation (CWO) den külemi Manipur nungi arua ken jenoka aliba Kuki nunger den ajurutep.

Kuki nungertem ya Medziphema, Sirhima, Maova, Molvom, Bungsang aser Khaibung nung jenoka lir aser Chakhroma teloktemi parnok nem relief materials aser tanga nüngdakba osettem agüja liasü.

Chakhroma Area kübok yimtsüng balala nung Manipur nungi aruba Kuki nunger 704 jenoka lir ta Chakhroma teloktemi metetdaksü.

Parnokji Medziphema Town nung nisung 306, Sirhima nung 126, Maova nung 69, Maova nung 103, Bungsang nung 39 aser Khaibung nung 61 lir.

## Centre-i pingana jenjang ajemtsü meranger

**New Delhi, July 12, 2023 (Agencies):** Linük kübok tesem aika nung pingana jenjang kanga tasak akümba atema Centre sorkari NAFED aser NCCF dang Andhra Pradesh, Karnataka aser Maharashtra nungi pingana alizütsü atema tetuyuba agütsüogo.

July 14 nungi Delhi-NCR region nung pingana jenjang ajemer ayoktsü ta Consumer Affairs Ministry-i metetdaksü.

Linük kübok tesem aika nung pingana seret ka nung Rs 200 agi ayoker aser iba khuret ya tziunglu kanga aruba ajanga lir. National Agricultural Cooperative

Marketing Federation (NAFED) aser National Cooperative Consumers Federation (NCCF) ajanga pingana alizütsü ta Ministry-i sangdong ka nung ashi.

Tesüiba ita ishika all-India average dang nungi teimba retail prices tesemtem jangjatsü aser item tesemtem dang pingana yoktsü ta parnokisa ashi.

July-August aser October-November ya pingana kanga madokba mapangtem lir. July ita ya tziunglu kanga aruba ajanga pingana belenshiba nung timtem ajurur aser iba jagi jenjang atur, ta Consumer Affairs Ministry-i ashi.

## European Parliament nung Manipur indang onük benoka jembitsü



**New Delhi, July 12, 2023 (Agencies):** France yimti Strasbourg nung European Parliament indang session ka nung Manipur indang onük benoka o atsüteptsü sentong lir saka India-i Bodbarnü iba ya 'internal matter' ka lir ta metetdaksü.

July 10 nungi 13 tashi Strasbourg nung European Parliament plenary session alidang Manipur onük benoka jembitsü atema parliamentary group 6-i motions benoka lir. Parliamentary group 6 nung leftist, right, centre-right,

conservative aser Christian teloktem nungi züngsemtem dena lir.

Parnoki "India, the situation in Manipur" omen nung ajemdaker European Parliament bangzüng ka renemtsü asüingdang.

Prime Minister Narendra Modi-i Brihostibar nungi anogo ananü France semdangtsü lia iba mapa inyaker. PM Modi-i Bastille Day Parade nung tetushi süa jaoker ka ama shilem agitsü sentong lir.

"Manipur onük ya India sasep indang ken o ka lir" ta

Indian foreign secretary Vinay Kwatra-i ashi.

"European Parliament nung atalokba onoki meteta lir aser bangdak EU parliamentarians den onoki tongtepratepogo saka onoki parnok dang iba onük ya India sasep indang lir ta shiogo" ta Kwatra-i metetdaksü.

Left Group, Verts/ALE Group, S&D Group, Renew Group, ECR Group aser PPE Group ajanga European Parliament nung Manipur onük jembitsü atema motions benoka lir.

## Nagaland nung helicopter services maneni angutsü



July 12, 2023 nü Dimapur Airport Nagaland CM Neiphiu Rio den Transport Advisor Temjenmenba, Thumbi aviation Pvt.Ltd. CMD KNG Nair, Airport Director Geetha Sahu aser tangartemi helicopter services tenzütsüba angur.

**Dimapur, July 12, 2023 (TYO):** Nagaland Chief Minister Neiphiu Rio-i July 12, 2023 nü Dimapur Airport nungi Helicopter service tenzütsüogo.

"Helicopter ajanga senzüba ya jenjang dalangba. Thumbi Aviation Pvt. Ltd. ajanga service shitak agütsütsü aser mapang shia mapang telemsa osang metetdaksütsü ayongzöker" ta CM Rio-i ashi.

"Helicopter anabosa ayutsüla aser ibaji nüngdakbapurtem aser talisa shirangertem aser taintem atema amshitsüla. Chopper service ya VVIP atema dang masü saka VIP mesüra ketdangsurtemi meta talang pilar aliba tesemtem semdangtsü atema nüngdaker" ta paisa metetdaksü.

"Maneni Hornbill festival mapang tourist temi tobur tajung Dzukou valley semdangtetsü atema Chopper service alitsüla"

ta CM Rio-isa ashi.

Nagaland sorkari MHA kübok Thumbi Aviation Pvt Ltd den ano küm 4 atema MoU nung sign sütepdang "Thumbi Aviation Pvt Ltd-i Nagaland nung alirtem tajungba nung yaritsü atema tajungba akümtsü imlar" ta paisa shisem.

"Nagaland nung Helicopter services ya 1988 küm tenzüka liasü saka 1989 February nung lendong ka atalokba sülen services anentsüsa aküm" ta GM, NST, Shikaho P Yephthomi-i ashi.

Iba sülen Neiphiu Rio-i kanga dang meranga inyakba ajanga 2007 küm nungi Nagaland nung helicopter services tenzüksü aser ibaji tanü tashi arur, ta Yephthomi-isa metetdaksü.

Helicopter service kanga amshiba ajanga Nagaland sorkari MHA den küm nung flying hours 480 aliba nungi 600 hours

kümogo, ta GM Yephthomi-isa ashi.

"Onoki Bell 412 Helicopters ana amshitsü aser tanga helicopter A 109 ka standby nun ayutsü" ta Aviation Co. indang CMD Captain KNG Nair-ia metetdaksü.

Iba tayimtsü nung pilot ana den passengers 13 menteter aser cargo 400 pounds benteter, ta Nair-isa ashi.

Parnoki Nagaland nung 2010 nungi 2 year term contract basis nung inyaka arur, ta paisa shisem.

Tanü Company-i Nagaland sorkar den MoU ji küm pezü (June 26, 2023 nungi June 26, 2027) tashi atema sign sütepdango.

Iba sentong nung Transport Advisor Temjenmenba, Airport Director Geetha Sahu, OSD Transport and Aviation Ababe Ezung aser NST Department ketdangsurtem aden.

## NPCC ajanga Maun Satyagraha sentong ayongzük



Parliament nung Congress lenir Rahul Gandhi anentsüba anema Congress Bhavan, Dimapur jakdang Bodhbarnü Nagaland Pradesh Congress Committee ajanga Maun Satyagraha (Silent Protest) sentong sentong agidang tangokba noksa nung angur.

**Dimapur, Chiteni/July 12 (TYO):** Parliament nungi Congress lenir Rahul Gandhi anentsüba anema state balala den külemi Nagaland Pradesh Congress Committee ajanga Bodhbarnü Congress Bhavan, Dimapur jakdang anogo ka Maun Satyagraha (Silent Protest) sentong ayongzüküa liasü.

Hokulbarnü Congress general secretary KC Venugopal ajanga sangdong ka

nung ashiba agi, Narendra Modi-i aniba BJP sorkar asoshi Gandhi ya opponent tashi tulutiba aser ajaki metettsüsa ola adoker ka lir, ta NPCC Communication Department ajanga ashi.

Modi surname dak sendakba nung Gandhi-i 2019 küm tenüng menükja jembiba nung aitsüba Gujarat High Court ajanga soita atatsü memolungba sülen Congress-i Supreme Court dangi abentsü

ta pai ashi.

Pa ola ajemdaktsütsü asoshi sorkari tasa tasen amshir, ta ashi.

Ajisüaka Gandhi-i pa tanatetba nung akang-akang nokdaka lir. Parliament nung mesüaka pa nüburttem ola amai lir aser pa dak nüburttemi tamang akar, ta Venugopal-i ashi.

"Iba yongji Congress kisüing masü saka linük ajungai Gandhi den nokdaka lir," ta pai ashi.

## Noklak nung World Population Day amung

**Dimapur, Chiteni/July 12 (TYO):** White Hall, Noklak village nung July 11, 2023 nü state level World Population Day munga liasü, kong Deputy Commissioner, Noklak, Arikumba NCS alakteta jaoker liasü.

DC Noklak, Arikumba-i iba sentong nung jembidang, nisung ajak nem tarutsü jenjang tajung aser maongka tajung agütsütsü nükjidong nung United Nations ajanga World Population Day ya amunger, ta ashi.

Nütsüing yongsük tali akumba ajanga mapa manungba, achi-ajemtsü aser talidak ki agi anüngba, pok masüngba, tashidak balala adokba, yimitem aser tesem tezülen terenlok asoshi tebilemstü akaba, rongsen balala nung khuret aliba, aluyimba tesemtem ajema akumba, tanen makai arem samaba, arem shiruru densema libajen nung timtem agütsüba, yimtenren tashi maitba, rara, lokti nung temenen balala, ochimashi amala tali akumba indang pai rasaa ashi.

Asenok World Population Day benjongtsü adenshia lir asünung, second shia alima nütsüing timba akumba metettsüla aser iba dak sendakba tebilemstüa tali akumer ta metettsüla, ta Noklak DC ajanga ashi.

Alima nung meimchir nütsüing yongsük zünba ajanga makamait, rongsenketzüing aser maternal health amala nung temolung agüja temelenshi arudaktsütsü nüngdaker.

Alima nung alir ajak asoshi tensa tajungba agütsütsü mechi asenok ajaki inyaktsüla, ta pai ashi.

FPA India, Nagaland Branch indang General Manager, V. Vincent Belho-i iba sentong

nung World Population Day indang teratet lemsatep aser Naga nunger den medemdanga liasü.

World Population Day ya alima ajunga nung küm shia July 11 nü amunger, aser iba mapang family planning, gender equality, poverty, maternal health aser human rights amala nung awareness agütsür, ta pai ashi.

Sustainable development temaba jenjangi ajungkettsü aser alima nung nüburttem takum tajungba kumdaktsütsü asoshi iba anogomung ya kanga tongtipang lir, ta ashi.

Makamait ajemdaktsütsü, health outcomes tajungba kumdaktsütsü aser education, healthcare aser tetsür nem maongka kasa agütsütsü osang sangdonga World Population Day ya amunger, ta pai ashi.

Total Fertility Rate (TFR) indang rateta ashiba mapang, TFR ya tetsür kati la takum alidang tanur asotsü akokba asadanga ka lir. TFR nungya sobaliba, socioeconomic conditions, education levels, contraception anguba, sorkar sentongtem aser tetsür temeden keta lir, ta pai ashi.

Pai family planning nungi tajangzük anguba tongtipang kar tejangja rateta ashiba mapang, iba ya ajanga kibong nung terenlok alir, tetsü aser tanur temang tajungba kumdaktsür, rongsenketzüing tajungba akumer, education temaba jenjangi ajungketer, nütsüing ainba ajemer, memeteti mashishia akumba nungi kumzüker, tanur raksa indokba nungi kumzüker aser libajen wazüka ayur, ta ashi.

Yimdak-yimtsüing nung family planning alitsü asoshi awareness agütsütsüla, family planning services tali agütsütsüla, nüngdakba

osettsüset peria angutsüla, healthcare ketdangsur nem training aser teyari agütsütsüla, rongsen indokba ajemdaktsütsüla, teburtem shilem agidaktsütsüla aser sentongtem asadangtsüla, ta Vincent Belho-i rasaa ashi.

Iba sentong nung Dr. Victor NC CMO cum MS, Noklak ajanga family planning atema medical services agütsüba indang ashi. Family planning ajanga tetsü aser kinü tanur asüba ajemdaktsür, tanur abenba tsüngta tawa peria agütsüba ajanga tanurtem temang nung tashi ita kumdaktsür aser mashiba aser tanur asoba mapang timtem tajemba kumdaktsür, ta ashi.

Family planning atema nüburttemi District Hospital, sub-centers, health workers aser ASHAs tem dang asüngdangtsü akok, ta Dr. Victor-i ashi.

Dr. Victor-i iba sentong nung tanur asoba nung tetsüngta ayuba, Copper-T, condom aser oral contraceptive pills indanga rasaa ashi aser teti atema family planning asoshi Tubectomy aser Vasectomy lir, ta pai ashi.

Iba sentong nung TL Khaoshai, Vice President, Khiamniungan Tribal Council; Shangchiu, President, Khiamniungan Students Union aser Keshe, Vice-President, Khiamniungan Menyiu Hoikam nunger temia jembia liasü.

Iba sentong nung Tsuken S ajanga temaja ken ka aten aser DPM Noklak Hosea NS Lam menden liasü.

Iba sentong ya Department of Health & Family Welfare, Nagaland kübok Noklak District Administration, CMO Noklak, FPA India, Nagaland Branch lungjemer ayongzüküa liasü.

OFFICE OF THE  
KELINGMEN KAKETSHIR TELONGJEM  
Hqr: Kelingmen Village, P.O: Changtongya-798613,  
Mokokchung District  
**TENÜNGSANG AGÜTSÜR**



**Ms Takujungla**

**Ms. Takujungla** D/o Mr. Imtinukshi Jamir & Mrs. Samasenla Lemtur CESE 2022 tatidang nung PGT (Botany) Dept. of School Education aser **Ms. Rongsennungla** D/o Mr. T.Meren Jamir and Mrs. Nupuinla Imchen CSRE 2022 tatidang nung LDA-cum-Computer Assistant (Directorate), Dept. of Environment, Forest and Climate Change jenjang tajung nguteta Kelingmen Kaketshir Telongjem asoshi tenüng tajung bener arutsüba atema tenüingsang aser tetushi tulu agütsür.

Tsüngremi nena taküm temaba jenjang nung maneni aniangma ta sarasademtsür.

**Sd/-**

**Nukshisangba,**  
**President, KKT**



**Ms Rongsennungla**

**Sd/-**

**Temsummeren,**  
**Gen.Secretary, KKT**

## Navodaya Selection Test atema online registration agitsü

**Dimapur, Chiteni/July 12 (TYO):** Session 2024-2025 mapang Class VI nung azüngtsü asoshi Navodaya Selection Test November 4, 2023 nü agitsü, aser iba atema online registration agitsü, ta Deputy Commissioner, Kohima sangdong ka ajanga ashi.

Iba online registration ya August 10, 2023 nü shibangtsü, anungji janra aliba candidate temi application form ya official website <http://navodaya.gov.in/> nungi download sür kasa website nung register sütettsü, ta sangdong ajanga ashi.

## Cyber Volunteers inyaktsü asoshi tenüng zülüoker

**Dimapur, Chiteni/July 12 (TYO):** Cybercrime tebilemstü azüoktsü aser cyberspace tasüngtet aser kumzüka ayutsü mechi Ministry of Home Affairs (MHA) indang Indian Cyber Crime Coordination Centre (I4C) ajanga Cyber Crime Volunteer Framework ka yanglua lir, aser yangji cybercrime timtem azioktsü asoshi nüburttemi shilem agiteter.

Cyber Crime Volunteer Framework nükjidong ya nüburttem tenzüksü tejangraba aliba nüburttem külemi lungjemdaktsütsü lir.

Cyber Crime Volunteer Framework ya "National Cybercrime Reporting Portal (NCRP)" ([www.cybercrime.gov.in](http://www.cybercrime.gov.in)) nung angutsü. India senso mashi kati

"Register as a Volunteer" tab nung nemer NCRP nung "Cyber Volunteer" mapa inyaktsütsü.

Volunteers tem ya state indang Law Enforcement Agencies aser nüburttem tsüngta senso ka ama inyaktsütsü aser nüburttem nem awareness agütsüba nung yaritsü.

Cybercrime kanga kera züina aoba aser cybercriminal temi technology tasentem amshiba ajanga nüburttem nem cybercrimes nükjidong angatetdaktsütsü kanga tongtipang kumogo.

Volunteers tem ya nüburttem tsüngta awareness agütsür ka ama inyaktsü aser parnoki nüburttem den social media sapang mesüra osangtsüsang agitepba lenmang balala ajanga awareness agütsütsü.



पेट्रोलियम एवं प्राकृतिक गैस विनियामक बोर्ड  
Petroleum and Natural Gas Regulatory Board  
प्रथम तल, वर्ल्ड ट्रेड सेंटर, बाबर रोड, नयी दिल्ली-110001  
PNGRB 1<sup>st</sup> Floor, World Trade Centre, Babar Road, New Delhi - 110001



28th June, 2023

### Public Notice No. PNGRB/Auth/1-CGD (14)/2022

Petroleum and Natural Gas Regulatory Board (PNGRB) ajanga aruya aliba 12 buba CGD Bidding Round atema Geographical areas (Gas) tatem kuma renemba mapang lir. Gas indang tentative list ka yamai yanglua lir :

Sr. No.	PROPOSED GA NAME	STATE/UT.
1	Arunachal Pradesh State	Arunachal Pradesh
2	Meghalaya State	Meghalaya
3	Manipur State	Manipur
4	Mizoram State	Mizoram
5	Nagaland State	Nagaland
6	Sikkim State	Sikkim
7	Jammu & Kashmir (except area already authorized) U/T	Jammu & Kashmir
8	Ladakh U/T	Ladakh

2. Tentative Gas indang list agüja aliba atema PNGRB ajanga stakeholders nungi shisa aginer, koba Secretary@pngrb.gov.in dangi 27.07.2023 tashinung email sütettsü.

CBC 33112/12/0002/2324

**Secretary**



July 12, 2023 nü Jakarta, Indonesia nung India External Affairs Minister, S. Jaishankar aser Vietnam Minister of Foreign Affairs, Bui Thanh Son na leniba nung ketdangsertem senden amendang tangokba noksa nung angur.

### Opposition senden nung adentsü atema party 24 nungi lenirtem jaok

**New Delhi, July 12 (Agencies):** Taruba Lok Sabha election nung BJP anema longjemer tokteptsü atema ano party tali ayongdentsü nükjidong nung taruba hopta Congress party-i Bengaluru nung senden ka ayongzüka lir.

June 17-18 anogotem nung ayongzüka senden nungji adentsü atema BJP nung madenba party 24 nungi lenirtem jaokogo; Patna nung mezüing ayongzüka opposition senden nung party 15 nungi lenirtemi shilem agia liasü.

July 17 nü senden nungji Congress Parliamentary Party chairperson, Sonia Gandhi-a adentsü aser tanünübuba (July 18) nungji taruba Lok Sabha election nung BJP anema tokteptsü atema asalentong yanglutsü, ta osang ka ajanga metetdaksü.

Osang angazükba agi, taruba oppositon senden

nungjibo MDMK, KDMK, VCK, RSP, Forward Bloc, IUML, Kerala Congress (Joseph) aser Kerala Congress (Mani) party tem-a adentsü.

Opposition lenir kati, anogo ananü senden nung adentsü atema Congress Tir, Mallirkarjun Kharge-i pa-a jaokogo, ta metetdaksü.

Opposition party 24 nungjagi tang Lok Sabha nung züingsem 150 shi lir aser maneni parnoki tanga party tema ayongsemsü meranger.

Osang angazükba agi, opposition party temi parnok longjemtsü atema o lemteptsü, talisa parnoki BJP anema Ato kilonser candidate ka shimtsü atema jembitsü.

June 23, 2023 nü Bihar yimtiba, Patna nung Bihar chief minister, Nitish Kumar-i ayongzüka senden nung adentsü atema party 16 jaoka liasü saka party 15 nungi

lenirtem dang aden. RLD lenir, Jayant Chaudhary tanga sentong ka nung adenba ajanga iba senden nung medenteti liasü.

Bengaluru nung ayongzüka senden nung adentsü atema Aam Aadmi Party (AAP)-a jaokogo.

Ajisüaka AAP-i, Delhi ordinance onük nung Congress-i yimjak nung AAP pusem nung ang parnoki taruba senden nungji adentsü, ta metetdakja lir.

Hombarnü Karnataka Deputy Chief Minister, D K Shivakumar-i, "June 17-18 anogotem nung opposition parties ajak nungi lenirtem senden amentsü. Lenirtem ajak arutsü. Mallikarjun Kharge (AICC Tir)-i Sonia Gandhi danga iba senden nung adentsü mepishiogo, yamaji lai iba senden nung adentsü ta metetdaksüogo," ta metetdakja liasü.

### Indian Mujahideen kiralongrar pezü küm 10 tepuokdak ayutsü

**New Delhi, July 12 (Agencies):** 2012 küm sorkar anema linük tesem balala nung kiralongratsü atema asalentong yangluba atema Bodhbarnü Delhi court kati Indian Mujahideen (IM) züingsem pezü küm 10 tepuokdak ayutsü obendang agütsüogo.

Special Judge, Shailender Malik-i IPC aser Unlawful Activities (Prevention) Act kübok Arrla balala nung Danish Ansari, Aftab Alam, Imran

Khan aser Obaid-Ur-Rehman nunger aija tepuokdak ayutsü obendang agütsü.

July 7, 2023 nü tai tonglokja alirtemi parnoki aibelenba nangzüka liasü aser anogo asemnü lir July 10 nü special court-i parnok aitsü.

NIA-i 2012 küm September ita nung Arrla 121A (India sorkar anema rara ayongzüka) aser Arrla 123 (rara ayongzüksü atema asalentong yangluba) nung ajemdaker

parnok anema ken o benoka liasü.

Parnok anemasa UAPA Act kübok Arrla 17 (kiralongratsü atema senotsü bendenba), Arrla 18 (kiralongratsü atema asalentong yangluba), Arrla 18A (kiralongrar camps amenokba), Arrla 18B (kiralongratsü atema nübo shimokba) aser Arrla 20 (kiralongrar telok nung züingsemba) nung ajemdaker parnok anema ken o benoka liasü.



July 12, 2023 nü Kolkata nung Trinamool Congress candidate, Derek O'Brien-i taruba Rajya Sabha election nung tokteptsü atema nomination file asüandang tangokba noksa nung angur.

Office of the  
**UNGMA WATSÜ TELEN**  
Dist. Mokochung, Nagaland. Pin-798601

**TENÜNGSANGAGÜTSÜR**

Asen Ungma Watsü Telen ajanga NPSE (C.E.S.E) Combined Education Service Examination nung takok angurtem nem tenüngsang agütsür.

1. Wb. Longrilemba Longkumer aser Wt. Pangerwangla na jala **Kr. Imlienla Longkümtsür**-i 6th position PGT in Mathematics anguba.
2. Wb. Imtiangshi Longkumer aser Wt. Temsujungla Jamir na jala **Kr. Pusuzenla Longkümtsür**-i 5th position Lecturer in Civil Engineering anguba.
3. Wb. Takumboba Longkumer aser Wt. Takosangla na jala **Kr. Repabenla Longkümtsür**-i 5th position PGT in History anguba.

Tarutsü anogotem nunga nenok atema temoatsü meshitsür aser wadang tasen tenzüka aodang Tsüngremi nenok taküm maneni len aniang ta sarasademtsür.

**Sd/-** **Sd/-**  
**Wt. Apokla** **Wt. Atila**  
**Tir, UWT.** **Tongti Tezülur, UWT.**

### Bengana jenjang azüoktsü atema sorkari tetuyuba tasen agütsü

**New Delhi, July 12 (Agencies):** Linük nung bengana jenjang tujen atuba azüoktsü atema Bodhbarnü Centre sorkari tetuyuba tasen ka agütsüogo.

Bodhbarnü Consumer affairs ministry-i Nafed aser NCCF ama cooperatives dang centres balala nung bengana belenshitsü atema Andhra Pradesh, Karnataka aser Maharashtra state tem nungi bengana alitsü tuyuogo.

Consumer Affairs Ministry-isa, bengana alizükba sülen Delhi-NCR region nung benganaji retail outlets nung ayoktsü, ta metetdaksü.

National Agricultural Cooperative Marketing Federation (NAFED) aser National Cooperative Consumers Federation (NCCF)-i item states dang nungi bengana alizüksü aser tesüiba ita ana tashi bengana jenjang tali atuba centres nung benganaji lemshitsü.

Ministry-i, "July-August aser October-November itatemji linük nung bengana junga

mezüsentehta itatem lir; July ita ya tzüingluruwa mongpu lir, aser ibaji ajanga bengana lemshiba maparen nung timtem aika adokba den külemi khu abenba tsütsü takoksa anguba ajanga jenjang tali atur," ta metetdaksü.

Tang bengana supply ji talisa Gujarat, Madhya Pradesh aser Maharashtra nung aliba markets-i arur. Delhi-NCR dangi supply asübaji talisa Himachal Pradesh aser Karnataka na nungi lir.

Delhi densema linük tesemkar nungbo bengana seret ka nung sen 200 kümogo; bengana dang masü saka tanga aonsotsütema jenjang tuogo.

Consumer ministry-i ashiba agi, tang India tesem ajaklen bengana 'average' jenjangji seret nung sen 104.38 lir. Tang bengana jenjang tasaktiba agi ayokba tesemji Rajasthan kübok Swai Madhopur lir (seret nung sen 200 dak tema) aser jenjang dalangtiba agi ayokba tesemji Rajasthan kübok Churu lir (seret nung sen 31).

### Kejriwal-i Delhi nung tzüme-tsüing tensa atema senden ayong

**New Delhi, July 12 (Agencies):** Yamuna ayong nung tzü metsüingbanga ayimba ajanga Delhi nung tzüme-tsüing tensa ajurutsüsa lir; iba tensa asadangtsü atema Bodhbarnü Delhi Chief Minister Arvind Kejriwal-i rongdak senden ka ayongzüka amen.

Delhi nung tzü metsüing aliba tesemtem nung curfew özüing benokogo. Delhi nung Yamuna ayong nung tzü metre 207.25 tashi atuogo; Delhi nung iba ayong nung tzü talangtiba atubaji 1978 küm liasü (metre 207.49).

Central Water Commission (CWC)-i ashiba agi, Bodhbarnep 4:00 ako nung Old Railway Bridge nung ayong nung tzü level ji metre 207 liasü aser ghonda pezü dang lirbo metre 207.25 tashi atu aser ano maneni level atutsüa akok.

Tesüiba anogo asem tashi Delhi nung aliba Yamuna ayong nung tzü level maneni tuogo.

Bodhbarnüsa Delhi Kejriwal-i shidi ka ajanga Union home minister, Amit Shah dang, Yamuna ayong nung tzü kanga tali metsüingogo, anungji Haryana

state nung aliba Hathinikund barrage nungi tzü chiocka nokdangtsüla, ta mepishi.

Kejriwal-i, Yamuna nung tzü level atubaji tzüinglu ajanga masü saka Hathinikund barrage nungi tzü chiocka agi lir, ta metetdaksü.

Pai Home minister dang, "Taonung tashi nungbo Yamuna nung tzü level metre 207.72 ajungtsü, ta Central Water Commission-i asadangtetogo; aser iba ya shisabulutsüsa lir," ta metetdaksü.

"Tesüiba anogo asemnü tashi Delhi nung tzüinglu maru. Delhi nung Yamuna ayong nung tzü level teimba akümbaji tzüinglu agi masü saka Haryana nung aliba Hathinikund barrage nungi tzü chiocka agi lir," ta shia pai union home minister dang Hathinikund barrage nungi tzü chiocka 'speed' ji ajemtsütsüla, ta mepishi.

Taruba hopta ishika nung Delhi nung G20 senden amentsü, aser iba mapang nungji linük yimtiba (Delhi) nung tzüme-tsüing tensa osang balala prokra ibaji ajanga alima dang osang tamajung sayutsü, ta paisa Amit Shah dang ashi.



## TIR YIMYIM YIMOBILEM (EDITORIAL)

DIMAPUR YANGTEPNÜ, CHITENI (JULY) 13, 2023

### Aluyimertema mitkar nungdaker!

**M**anipur nung kin o kin na tsungda nisung tepsetba aser kiojen rongdoktsüba lendong tulu ataloker joko ita ana dak tali süir saka tensa tajungba makumba agi joko aluyimertema mitkartemi nüka lia alu inyaktsüsa kumogo. Nisung aika pei ki rongdoker tanaben meyipa aotsüa tetsübu agi moutet tangalen jenoka lir, tanurtem aika kakterejui moutet anenogo aser mapa inyakertema aika pei mapa inyakdaki moutet tetsübu tarendak tia nung lir. Item ajak ya tangar bendangertemi yanglutsüba tensa ka masü saka Manipur nung alirtemi parnoksa yangluba tensa ka lir. Atangji, lendong tenzükbajibo Manipur nung Miete nungertemi Scheduled Tribe jenjang meshiba anema Manipur nung Naga aser Kuki ama kintemi lokti senden ayongzüka akaba anogo nungi tenzük. Ajisüaka, lendongtsudong tulu atalokba sülenbo Meiti nungertemia ST jenjang aginüba onük jembiba mangashir aser Naga aser Kuki kintemia Meite nungertem nem ST jenjang magütsütsüba onük indang mesushir. Aji oda, Naga nunger o Kuki nunger na külem ser Meite nungertemi ST jenjang meshiba anema nokdang nung, Miete nunger o Kuki nunger na tsungda-ang lendong atalokba ya tangar asoshibo teratatsüka lir. Atangji, Miete nungertemi Kuki nunger Myanmar nunger alirtemi Manipur government li dena atsünga yim küma arur aser ano parnok ozüngi memelaba machimajemtsü lua ayimer aser shibelen mapatema inyaker ta aitsüba angashir. Ajia shitak alitsüa akok. Ajisüaka, iba tebilemstüjibo Manipur government-i koktettsüla aser government taküm ali tashibo pei state nung kin o kin na tsungda azütokshi lendong ataloka tekülem kitem dena rongdokja raratsüsabo meinyaktsüi nokdangtettsüla. Atangji, tang Manipur nung atalokba lendong amaibo tanga lima nung atalokba kangabo mangashi. Ibaibo government nung alirtemi repranga lia meshisangdangi atalokdaktsüba mapa ka asütsü. Iba jagi tangbo Meite nunger mesüra Kuki nunger akoksatsü ta masü saka Manipur rangben akoksatsüsa akümer. Yimten nung kechi teloki yimsü südir süang, nübertem rongnung yimjung aser tesünep alitsüla. Iba jagi dang terenlok mapaa inyaktetsü aser alua yimtetsü. Aiben yimsüsürtemi yimten yimsüsüba menden nung mener yimten tashi amshiba jagi tebok asungtsü amai bilemer, ajisüaka aluyimertemi alu meyimra chiyongtsü kong nungi angutsü? Aji oda, yimten yimsüsürtemi mebilemdangi pei nübertem rongnung meputep adokdakja petsaperong adokdaksür aser tangar bendangertem dena rara menar. Ajisüaka, ibaji peisasa pei tim atemtsüba sentong yangluba ka dang asütsü. Jokorla, ita ana asem tashi kidang nungi ayazüka mapai ao majung rarateper, anungji kidang chiyongtsüa maka aser mapaia moutet ta nübertem timatemsü tenzük. Aji oda, takumbo timtemyonga yaküm züsentetba den tangar temeimertemi teyari agütsüba agi otettsüa akok saka taküm alu meyimra sangküm chiyongtsübo makatsü. Idangji, yawara arutsü, aker poktettsü aser ano tensa tamajungba akümtsü. Koyim limaa mitkartemi alu nung aluyimertem nüka lia alu inyakdaksüba osangbo mangashi aser mangu. Ashiko, tang Manipur nung alu tashi mitkartemi anüksüsa akümba tensa tia ya Manipur state government nung alirtemi khen mebilemdangi telemtetba ka agiba ajanga mesüra mekümdangi o ka jembiba ajanga atalok alitsüa akok. Tanü lima ya mapa aser rongsen raktepba mapang ka lir, anungji government nung alir yimsüsürtemi ochishia yimsü mesüra tang Manipur nung amaji kin o kin na tsungda tsükchitepdaktsütsü aser aji tetsüsabo pei dak kaotsü. Yimten nung ochishia yimsü mesütetba aser timi telemtetba magitetba nungi nübertem rongnung meputep tenzükbaji yimten yimsüsürtem dak dang atemtsü. Aiben yimsüsürtemi, tzu menendaksür ango apu ama, nübertem rongnung meputep adokdaksür pei asoshi jenjang alangtettsü bilema inyaktsüa akok. Ajisüaka, ibaji an molokbang nung atem ama dang asütsü. Tang Manipur nung timtem atalok tenzükbaji, ashiko, an molokbang nung atem amaji asütsüa akok. Aji oda, Nagaland nungbo kin o kin na raraba agi aluyimertema dena mitkari anüksüsa mataloktsü atema, Tsüngrem dang sarasadema yimten, lokti aser arogo lenirtemi anir nübertem ajak indangindanga alitsü merangdi.

## OLEMSABANG

### TEMELENSHI ADOKDAKTSÜBA LENISÜBA: MOSA TAKÜM ASER LENISÜBA NUNGI TANGAZÜKTSÜ KAR

~ Temsüyanger, CTC (source:- Mitkar)

(Yashi adok nungi...)

Yamaji süaka ni na dang shimtetogo ta Tsüngremi kodanga Mosa dang melanzü. Tsüngremi Pa shiba Mosa dang ashi, "Niji shiba aji Ni", iba jagi Mosa nem tashi agütsü, Mosa taküm shiba iba jagi jangjatsü, anungji Tsüngrem leniba Mosa den liasü. Tsüngremi Mosa jembiba nung yaritsü aser kechi jembitsü Pai sayu (Ani. 4:12). Yamaji Tsüngremer tashi aser taküm ajanga Tsüngremer lenisüba wadang Mosa nem nongloktsü aser ibaji ajangzüktsü asoshi Mosai apuso. Ibai meimchir ka dang asünung kangasa wadang tulu aser mapa tasak liasü.

**Mosa Lenisüba nungi Tangazüktsü Kar:**

**1. Mapang aben nüburtem den jembia tongtepratepa litetba lenir ka Mosa liasü.**

Mapang aben Mosai nüburtem den jembiba asenoki Laishiba nung angur; "...Israel chir ajak dang Mosai jembiba o itemi lir" (Tazüng. 1:1), "Yordan anüdoklen Moab lima nung Mosai iba ozüng ya rasaa ashi" (Tazüng. 1:5), "Nüburtem dang mela-ang..." (Tazüng. 2:5), "Mosai kechi mela aji Israel nüburtemi inyak..." (Ani 12:35), "Mosa o Aron na dang Kibubai melaba ajak Israel nungertemi tashi anga inyak" (Ani. 12:50), "Anungji Israel chirtem dang shiang, "Ni Kibuba lir, ni nenok ljiip nunger alar tia nungi anitettsü, aser parnok alar akümba tia nungi ni nenok kümüzüktsü. Ni kü teka songtoka aser obendangba tulu agi nenok alangzüktsü. Nenok kü nübur asütsü asü ni nenok Tsüngrem asütsü. Aser kodang ni nenok ljiip alar tia nungi anitetdir idangji nenoki ni Kibuba, nenok Tsüngrem ta metettsü" (Ani. 6:6-7). Tsüngrem aser nüburtem tsungda tenyar ka ama Tsüngremer tatalokbatem aser sentongtem ajunga pai nüburtem dang ashi, pa asoshi kecha nüburtem nungi miima mayu. Nüburtemi Kibuba tsübu, Pa dak amang, aser Pa lar Mosa dak amang (Ani. 14:30).

Pei mapa nung asüyonga mesüra yimsüsüba nung asüyonga kodang chichiba aser otia jembitepba melilir, kati ka tsungda tesendaktep raksar, aser telemtetba tai agir. Lenirtem shirnok dak teratatsü taküm lir parnok dak nüburtemi temulung malemer, kechiaser parnok langka miima lir ta teti nüburtemi bilemer. Saka lenirtem aikati nüburtem dang ototia mejembii karbo pa/la asoshi ayu nung dang nüburtem dak tashi lir ta bilemer. Tanü iba ama lenirtem aika lir. Talisa alimar yimsüsüba len kodang shisadangdir mapang nüburtemi shimtetba lenirtem aika pei nüburtemi election mapang shiteterbo pei nüburtem majurudangba lenirtem aika lir.

**2. Nüburtem Den Teti Sendaktepa Nüburtem Teti Ajungmesoba Lenir Ka Mosa Liasü**

Mosai nüburtem dang angatsü asoshi nongnanga maliasü. Nüburtemi asungdangbatem pai angashi, pai shisadang, aser kechi tajung aji pai agizük (Tazüng. 1:22-23). Anungji maneni nüburtem aser Mosa tsungda tesendaktep tajung liasü. Pai nüburtem dang anga, angashi, aser parnok den maneni jembia. Nüburtem dang angadangerang pai telemtetbatem agi.

**3. Ozüngsüba Tajung Mosai Yangertetta Nüburtem Asoshi Yutsü:**

"Idangji ni nenok obendangertem dang ni shiogo, 'Nenok adianutem tsungda nung o angang aser nisung kati pei adianu den süshia mesüra pa den aliba bendanger kar den süshia ochi shia o bendangang. O bendang kecha nunga tejak tereprang, tulu aser tila ajak dang kasa angang. Nenoki nisung baji Tsüngrem meyong lir. Nenok asoshi o tasakji kü dangi bener arung aser aji ni angatsü. Iba mapang nung nenoki kechisa inyaktsü item ajak indang ni nenok dang shiogo" (Tazüng. 1:16-18). Kanga dang tongmelang saka shirnoki iba tetuyuba angatsü mulunga liasü parnok asoshi terajem liasü." Nenok asoshi tanishirtem aser obendangertem nenok kin shia nungi yimti shia shimtsüla, aser parnok Kibuba ne Tsüngremi nenok nem agütsütsü aliba nungji ochi agi nüburtem o bendangtsü. Nai ochi mashiba mapa meinyaktsüla mesüra tejak mereprangtsüla. Nai süpokrem magitsüla, kechiaser süpokrem agi shisa takar tenük pokdaksür, aser temeshipur o meyipsatsür" (Tazüng. 16:18-19).

*Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## California tzüymküm nung nisung 4,500 dak tema bapti



July 08, 2023 nü California nung aliba Cove beach nung Pastor Greg Laurie aser Harvest Christian Fellowship-i ayongzükba sentong nung baptiba mapang tangokba noksa nung angur. Iba sentong nung nisung 4,500 dak tema tzü nung baptiogo.

**July 12, 2023:** July 08, 2023 nü California tzüymkülen Pastor Greg Laurie aser Harvest Christian Fellowship-i ketdangtia agiba sentong nung nisung 4,500 dak tema tzü nung baptiogo, aser iba ya khen nung lokti külemi baptiba sentong tulutiba rongnung ka asütsü.

Jesus Revolution Pirate's Cove Beach Baptism, ta ajaba sentongji Honibarnü Pirate's Cove Beach nung agi aser iba sentong nung nisung 20,000 dak tema aden.

Iba sentong nung baptirtem rongnung pastor Laurie'er semchir, Stella-a densema liasü.

Osangbener den jembidang Laurie-i, tang nisung aika baptiba ya tawa sayaba "Jesus Revolution" film ajanga takok angubatem rongnung ka lir, ta ashi.

Paisa, "Jesus Revolution film ajanga nisung aika kongshio go aser iba film repringba sülen nisung aika Khrista dangi aruogo," ta ashi.

"Iba film nung tzü nung batiba noksatem ajanga parnok kongshi aser pei taküm nung parnokia kasa telemtetba aginüa liasü. Iba ya atangji taküm indang film lir aser ibaji kü taküm otsü aser tangar aika taküm otsü nung ajemdaker yangluba lir," ta pai ashi.

Laurie-isa, tang nisung aika tzü nung baptiba ya hopta ana tejaklen Honda Center nung ayongzükba agiba SoCal Harvest ajanga-a lir; iba sentong nung nisung 3,000 dak tema Khrista sülen anidaksü telemtetba agia liasü, ta ashi.

"Baptiba sentong nung adentsü atema onoki parnok-a jaoka liasü," ta pai ashi.

Honda Center nung ayongzükba SoCal Harvest Crusade nungji nisung meyerijang aikati Yisu Khrista nem takum bendanga agüja liasü. Iba sentong ayongzükba tesem nung nisung 16,000 adenshi aser alima tesem balala nungi iba crusade ya

online nung nisung 47,000 dak temai repringa liasü.

Pastor Greg Laurie-i iba sentong ya küm 34 tashi ayongzükba agia arur aser alima tesem ajungalen iba Crusade ya 121 ben kaogo.

Pastor aser Harvest Crusade & Harvest America tentetsang, Greg Laurie-i, nisung aika baptiba ya tanela temeshi ajanga mapa inyakba lir, ta ashi.

1970s nunga Pirate Cove nung nisung aika baptia liasü.

"Ni yangji (Pirate's Cove) liasü aser ni-a yangji bapti. Ajisüaka iba yabo balaka lir, kechiyong onoki ayongzükba sentong nung tang nisung teimtiba aden. Baptisüpertemji mile tesadang shi tarensena nokdaka liasü aser nisung aika baptisü atema ghonda ana dak tali aremzüka dang ata-a liasü," ta pai ashi.

"Pirate's Cove nung baptiba sentong aika nung ni dendangogo, ajisüaka tang agiba sentong ya tulutiba asütsüa akok," ta pai ashi.

"Arrshi küm 85 tambur kati 'Jesus Revolution' film repringba sülen pa taküm nung Khrista agizük aser film nung baptiba tesem kasa nung pai baptinüa liasü. Par kinüngertemi ibaji mamangteti liasü, kechiyong pai kodanga Khrista magizüksü, ta parnoki bilema liasü," ta paisa metetdaksü.

Laurie-isa, Honibarnü baptirtem atema 'follow up' sentong agitsü aser Arogo balala nung züngsemdakja chichiba nütsüng kümdaksütsü, ta ashi.

Taküm May ita nung Pentecost Sunday nunga Pirate's Cove nung nisung 4,100 dak tema baptia liasü.

'Jesus Revolution' film ya taküm February 24, 2023 nü theater nung saya aser iba film ya online ajanga angati-a repringtettsü. 'Jesus

& Reddit, 1movies, 9movies aser yes movies ajanga download sütettsü mesüra angati repringtettsü.

Jesus Revolution film ya Pastor Greg Laurie-i pa taküm otsü züluba kakat nung ajemdaker yangluba film lir. Film otsü nung Greg lanur asüba mapang nung 1960 aser 1970s mapang pai Southern California nung "Jesus movement" nung shilem agir; tatemsabo iba movement ya North America aser Europe tashi prokshia liasü.

America nunger puti otsü nung revival tulutiba adokba nung ajemdaker Jesus Revolution film ya yanglu. Jesus Revolution film ya February 22, 2023 nungi screening asü aser February 24 nü alima tesem ajaklen sayaogo.

## Taküm India nung Khristanem anema inyakba tatalokba 400 jungogo

**July 12, 2023:** Meimchir temeden atema inyakba Khristan telok kati, taküm küm tenzüker tang tashi nung India nung Khristanem anema inyakba tatalokba 400 jungogo, aser item ama tatalokbaji Uttar Pradesh state nung teimba liasü, ta metetdaksü.

New Delhi nung amenoka aliba United Christian Forum (UCF)-i, yakümbo July ita tashi nung state 23 nung Khristanem anema inyakba tatalokba 274 dang liasü, ta metetdaksü.

July 11 nü UCF-i sangdong ka ajanga, Khristanem anema inyakba tatalokbatemji UCF indang toll-free number ajanga metetdakja liasü, ta ashi.

India nung nütsüng teimba aliba state- Uttar Pradesh nung taküm Khristanem anema inyakba tatalokba 155 lir, aser state tem sasep nung ibaji teimba lir.

Uttar Pradesh nung Khristanem anema inyakba tatalokbatemji Jaunpur district

## ANO GO ABEN TSÜNGREM DEN

## Laishiba

## T. ken 119: 1 - 8

Ne ket nung Laishiba makara ne Khristan taküm koma alitsü ta nai bilemer? Laishiba ne taküm asoshi kechi inyaktsü ta bilemer?

Iba ken nung telangzüba kar Tsüngremi asenok nem agütsüba angur. Tekong shia nung ama iba ken nung Tsüngrem O amshiba angur. Tekong 1 - 8 tashi nungji Laishiba koda amshitsü iba indang sayur.

" Shirnok lenmang nung tamayazür lir, shirnoki Kibuba ozüng nung jajar parnok temoatsüba" ( t. 1). Tamayazür tetezü, shirnok dak tashishitsü maket parnok dang ajar. Shirnok dak anemsü mali, tema nung tajung ama sayur saka telung nung teraksa shisatsü aliba yimya mali parnokji tamayazürtem lir. Parnokji tsüngchirtem lir. Asenok taküm Tsüngrem o nung yangera, asenok dak tsüngchiba alitsü.

Ken züluri ashir, " Shirnoki pa ozüngtem benshir, shirnoki temulung ajak agi pa bushir, parnok temoatsüba" (t. 2). Ne mulung ajunga Tsüngrem o nung lir asü? Laishiba mulungjangji telunglen shisatsü lir. " Kodang ne temeshi obendangba ni angazükdir, ni ne nem tamayazüba temulungjang agi tenüngsang agütsütsü" (t. 7). Iba nung ne temulungtetbaa dena lir." Ni ne ozüng benshitsü" (t. 8). Kodang nai ne mulungjang ajunga, ne tekolok aser temulungtetba ajunga Tsüngrem O nem agütsüdir, ne taküm külemi aientsü tenzüker. Tanü ne taküm mesüra ner kibong raksaa lir asü? Tsüngrem O dangi meyipang.

Laishiba zülurji ka lir - Tsüngrem. Iba nung omen ka lir - Yisu Khrista. Iba nung osang ka lir - Tekümtet. Aser yagi temoatsü ka bener arutsür - Tsüngchi taküm.

Tsüngrem O ji tanelaren tashi angdak lir. Ochi jagi tanela mesür. Kodang nai tamang nung jajadir, ne tanela mesütsü asoshi Tanela Temeshii Laishibaji amshir. Tsüngrem O jagi ne taküm tsüngchi taküm yanglujang.

nung 13 liasü, Raebareli nung 32, Madhya Pradesh district nung 11, Sitapur district nung 21, Punjab nung 12, nunga 11, Kanpur nung 10, Karnataka nung 10, Bihar Azamgarh nung 9 aser nung 9, Jammu & Kashmir Kushinagar district nunga nung 8 aser Gujarat nung tatalokba 9 liasü.

Linük nung districts sasep nung Khristanem anema inyakba tatalokba teimtibaji Chhattisgarh kübok Bastar nung tatalokba 31 liasü, ta UCF-i metetdaksü.

Taküm India nung Khristanem anema inyakba tatalokba teimbaji June ita nung liasü; June ita nung Khristanem anema inyakba tatalokba 88 liasü, aser ibaji asadagra anogo shia Khristanem anema inyakba tatalokba asemsem asütsü.

"Tesüiba ita ana dak tali northeastern state Manipur nung rarar; state nung Tenla ki noklang aika raksatsüogo aser nisung aika süogo," ta UCF-i metetdaksü.

Taküm Chhattisgarh nunga Khristanem anema inyakba tatalokba 84 lir, Jharkhand nung tatalokba 35, Haryana

nung 32, Madhya Pradesh nung 21, Punjab nung 12, Karnataka nung 10, Bihar nung 9, Jammu & Kashmir nung 8 aser Gujarat nung tatalokba tenet liasü

Uttarakhand, Tamil Nadu, West Bengal, Himachal Pradesh, Maharashtra, Odisha, Delhi, Andhra Pradesh, Assam, Chandigarh aser Goa state tem nungbo Khristanem anema inyakba tatalokba 5 den tajemba dang liasü.

India kübok state balala nung anti-conversion ozüng kübok Khristan 63 anema ken o benok, pastor 35 shi jail nung puok aser parnok aika nem bail magütsür, ta UCF-i metetdaksü.

Telok balalai Ato kilonser, Narendra Modi aser Tir, Draupadi Murmu na ajuruogo saka linük nung Khristanem anema inyakba manener; iba dak alia Supreme Court-ia Khristanem anema inyakba anentsü tuyuogo, saka menokdangteter, ta UCF-i metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Renti

(v) aika küma ao (multiply)

\* Tsüraburtemi meranga inyakba nung Tsüngremi rentisa moatsü.

Rentok

(v) tatsüba kümdaktsü, lepdok, rangdok (cut a part off)

\* Tamburtemi au marok aika kanga rentoka yanglu.

OLONG PAITEP # 6574

Grid for OLONG PAITEP # 6574 with numbers 1-18 in various cells.

TIPLIN

- 1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S \_ \_ \_ \_ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. \_ \_ \_ hi - (3)
16. Akümüli nungi pilar - (3)

OLONG PAITEP # 6573 TELANGZÜBA

TIPLIN :

- 1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü,
5. Lenti, 7. Tajangzük, 11. teronem,
12. Sempa, 13. Jahaz.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....

TMC indang fact-finding team kati Manipur semdangtsü

Imphal, July 12, 2023 (Agencies): Mamata Banerjee'er aniba Trinamool Congress (TMC) party-i Manipur nung kuli bendentsü atema telok ka yoktsü. Züingsem pungu agi akümba TMC fact-finding team-i July 14 nü Manipur atongtsü. Parnoki Manipur-i arudang relief camps semdangtsü aser

timtem ajanga kongshia alirtem den ajuruteptsü. TMC teshimtet telok nung Derek O'Brien, Sushmita Dev, Kalyan Banerjee, Dr Kakoli Dastidar aser Dola Sen nung lir. TMC-i Centre aser Manipur nung BJP-i aniba sorkartem inyaksangshi aija arur.

Zo-Kuki teloki CM Biren Singh poster rongdoka lungkak ait

Aizawl, July 12, 2023 (Agencies): Aizawl nung amenoka aliba telok ZORO (Zo Reunification Organisation)-i July 12, 2023 nü Manipur nung kin o kin raraba anema lungkak aitba sentong ka agiogo.

ZORO ta ajaba telok ya Chin, Kuki, Mizo aser Zomi nungeri tentetba telok ka lir aser parnoki Manipur CM N Biren Singh aser Prime Minister Modi indang poster rongdok.

Manipur nung kin o kin anema raraba aitsüba den Centre sorkari mapa meinyakba atema ZORO-i lungkak aitba sentong ayonga agi.

"Zo nungeri amakba aser PM Modi-i ola madokba aitsür. Kibong nung tekolaki pei chirnur ajak anepalur saka Centre sorkaribo Zo nungeri atema mebilemstür" ta ZORO President Pu R. Sangkawia-i ashi.

ZORO Vice President Pu F Ngurbiakvela-i anir agiba sentong nung Manipur nung nisung asürtem bilemteta mangyimba mapang agi.

Tang tashi nung Manipur nung nisung 124 süogo aser 377 yiru ta ZORO-i osang bushitetba metetdaksü.

Külen, nisung 60 samar bushitepdar aser yimtsüing 290 nung kiojen 7,247 rongdoktsüogo ta parnokisa ashi.

Manipur nung kin o kin tsüingda rara nung tenla ki aser quarters 357 rongdoktsüogo aser nisung 41,425-i pei talidak toktsür ogo ta ZORO-isa ashi.

ZO Reunification Organisation (ZORO) indang rally nungsa Manipur nung Zo nungertem asoshi administration balaka agütsütsü takhangba agütsüogo.

MENUNGRA BILEMTETER



(Tasüba anogo: July 13, 2022)

Onoki teti meima aliba asür IMKONGLILA (Changtongya Town) tanü na onok den meliaka onok mulungjang nung teti lir. Pungmang ka ama akümüli toktsür küm ka süitema arudang onoki na menungrar aser ne temeim kodanga mamateter.

- Temeim Kinungbo, Chirnur, Semchir aser kinungertem

OFFICE OF THE KOHIMA MONGSENYINTI LONGJAKREP JAMIR KIDONG KOHIMA: NAGALAND TENÜNGSANG AGÜTSÜR

Kohima Mongsenyimti Longjakrep Jamir Kidong nungi Nagaland Staff Selection Board (NSSB) Exam 2023 nung shirnokisa takok tulu ngutetogo nenok ajak nem asen kidongi tenüngsang aser tutushi konang agütsür.

- 1. Miss Asenla Jamir D/o Mr. Repanungsang Jamir aser Mrs Tolapokla Ozukum. Lai Nagaland Information Commissioner Office nung Directorate LDA Cum-Computer Assistant mapa angu.
2. Temjenngangtet Jamir S/o Mr. Tsuktizulu Jamir aser Mrs. Chubamenla Ozukum. Pai Environment, Forest & Climate Change Department nung Dist. LDA-Cum-Computer Assistant mapa angu.
3. Chetenlemba Jamir S/o Tsuktikumzuk Jamir aser Mrs. Tamsunenla Ozukum. Pai Public Health Engineering Department nung Dist. LDA Cum Computer Assistant mapa angu. Tarutsü anugotem nung nenok jenjang balala nung lia aodang Govt. aser nübur tenzükba mapa nung Tsüngremi nenok wadang manini moajangma.

Sd/- Sentikazung Jamir President, KMLJR

Sd/- Imnalepzung Jamir Secretary, KMLJR

15th NAP (IR) Mahila Band-i 'India's Got Talent' nung shilem agir



Dimapur, July 12, 2023 (Agencies): 'India's Got Talent' ta ajaba sentong nung Nagaland nungi 15th NAP indang Mahila Band-ia shilem agi.

July 29, 2023 nü television nung kanga dang nungtugu Indian talent competition sayatsü.

Iba atema SonyTV-i promotional video ka sayaba nung Mahila Band indang noksa

dena lir. "Nagaland Police atema kanga dang nüma atangba mapang ka" ta Nagaland DGP Rupin Sharma-ia promotional video lemsatopogo. "July 29 nü 'India's Got Talent' indang season 10 nung asen 15th NAP (IR) Mahila band pusemer. Linük ajungalen Military & police bands lir saka tetsür dang adenba police band kati

musical genres balala atemba yabo balaka mangashidang aser parnoki takok nguang tengu iba ajanga nisungtem puatsü" ta Twitter nung nisung kati zülula lemsatop.

India nung kanga nübortemi kanga sapua reprangba Talent hunt shows 'India's Got Talent' indang season 10 buba TV aser OTT screens nung sayutsü.

Meghalaya Congress-i Rahul Gandhi pusema lungkak ait

Shillong, July 12, 2023 (Agencies): Meghalaya Pradesh Congress Committee (MPCC) lennirtem aser züingsemtemi Rahul Gandhi pusema sayua 'silent protest' ka agiogo. Rahul dak aibelena defamation case ka nung tai tongloksü aser Lok Sabha nungi

disqualify asü ta Meghalaya Congress-i metetdaksü.

Bodbarnü Congress Bhawan, Shillong nung MLA tem, MP-i anir lennirtem aser party züingsemtem adenshi.

2019 küm Rahul-i "Modi surname" indang jembiba ken o atema Gujarat High Court-i temepishiba magizükba sülen

Congress-i Supreme Court dangi iba ken o abentsü ta shiba sülen tanü Meghalaya Congress-i Rahul Gandhi pusema lungak aitogo.

Sorkari Rahul Gandhi dak mapa tamajung inyakba anema onoki "silent protest" agir ta CPL leader aser Myllichem MLA, Ronnie V Lyngdoh-i ashi.

# China-i alima nung mezüngbuba methane totzü atsükba space rocket anünglaki yok



**Beijing, Chiteni/July 12 (Agencies):** China nunger private company kati alima nung mezüngbuba methane-liquid oxygen space rocket anünglaki yok, ta China indang state media ajanga ashi.

Zhuque-2 carrier rocket ya Bodhbarnep 9:00 ako nung northwest China indang Inner Mongolia autonomous region nung aliba Jiuquan Satellite Launch Center nungi yok aser yimya nung aliba ama flight mission renem, ta state media ajanga ashi.

Ibai Beijing nung amenoka aliba LandSpace ajanga Zhuque-2 tanaben merangba lir - koba China indang commercial space sector nung company mezüngpur - aser iba yagi US madak takok angur, koba launch vehicles indang

'next generation' akumtsü akok aser iba yagi tzü-mopung tajemba menener, tajungba, talangba aser tanaben amshitetba rocket atema propellant tapet ta züngshir.

Zhuqu-2 ya mezüng December ita merang saka tamakok ajurua liasü.

Elon Musk indang SpaceX aser Jeff Benzo indang Blue Origin amala methane totzü atsükba space vehicles yanglutsü merangtepba mapang LandSpace-i takok ngua iba tayimtsü anüngleni yoktetba ajanga China ya mezüngpur akumer aser kasa anogo China-i 2023 tashinung rocket ana ita limai yoktsü sentong lir ta shia liasü.

Chinese state media ajanga ashiba agi, rocket ana yoktsü sentong aliba rongnung ka nung

spacecraft bener atutsü aser ita lima nung anentsü aser ka nung astronauts tem anir atutsü.

Rocket anaprong ya ita indang orbit telungi aitsü aser takok ngua anenba sülen China nunger astronauts ya lunar lander telungi aitsü aser ita limai alutsü, ta China Manned Space Agency engineer kati Bodhbarnü state media dang ashi.

China-i mapang talangka nungi astronauts aser moon lander probe ka ita limai bener otettsüsa heavy-duty rocket tashi tait yanglutsü merangba nung technology tsütsü tetsükdaktsü ajurua aliba ajangtettsü.

China nunger astronauts temi ita lima nung scientific mapa inyaka sample bendenba sülen lander yagi astronauts ya anünglen yimzua aliba spacecraft dangi bener aotsü aser yangji mener alimai meyipa shilangtsü, ta China Manned Space nung deputy chief engineer Zhang Hailian-i Wuhan nung senden ka nung ashi.

2020 küm China-i nisung madenba mission ka nung ita lima nungi sample tem bener alua United States aser Soviet Union sülen ita nungi sample bener aluba linüktem rongnung China ya lintük tasembuba akum.

April ita Beijing Tianbing Technology ajanga kerosene-oxygen rocket ka takok ngua anünglaki yokteta liasü, anungji totzü tanaben inoka tanaben amshiba rocket tem yangluba tsütsü mera tasen ka agia liasü.

# UK-i Sudan nunger sepai lenirtem nem tenokdangba agütsü

**London, Chiteni/July 12 (Agencies):** United Kingdom-i, Sudan nung tang mangatettep adoker aliba telok ana den sendaktepba aliba company/lokti tentettep nem tenokdangba agütsüogo.

Sudan nung Sudanese Armed Forces (SAF) aser Rapid Support Forces (RSF) na ita asem shi raratepba ajanga nisungtem timba linük nungi jenshia odar.

British sorkari Bodhbarnü Sudanese Armed Forces (SAF) den sendaktepa aliba shishilembar asem aser paramilitary Rapid Support Forces (RSF) den sendaktepa aliba shishilembar asem nem tenokdangba agütsüogo. Telok ana tsüngda yimjung atema sensaksemtsü aser humanitarian teyari agütsütsü atema lenmang lapoktsütsü asoshi tang rara nung aliba telok anaporongla nongshitsü atema iba jenjang agiogo.

Army aser army indang chief commander, General Abdel Fattah al-Burhan nem senotsü teyari aser tanga teyari balala agütsüba atema Defence

Industries Systems (DIS) aser tanga entities ana nem tenokdangba agütsüogo.

UK-i ashiba agi item shishilembar yagi general tem nem senotsü teyari agütsü aser parnok kübok company 200 dak tema lir shirnoki küm nung USD billion 2 dak tema tajangzük aazüker.

RSF nem senotsü aser prangbong hadir balala agütsüba atema UN-i Al-Junaid nem tenokdangba agütsüogo iba telok ya paramilitary force lenir General Mohamed Hamdan "Hemedti" Dagalo-i tanga company tem den longjemer amenokba lir.

"Shirnok inyakyim ajanga nisung million aika dak kongshiogo parnok dak indang indanga rangloker iba tenokdangba agütsüogo. Telok anapronglai rara mapang ceasefire benokba aibelenogo, koba agizüktsü makok," ta Foreign Secretary James Cleverly-i sangdong ka ajanga metetdaktsü.

"Telok ana tsüngda raratepba ajanga tai maketba civilian tem maneni timtemer aser item

company temi tagidak makaba nung RSF mesüra SAF nem senotsü teyari agütsü intokba ya odangbo mener repranga matatetsü," ta Foreign Secretary James Cleverly-isa ashi.

United States-i, Sudan nung rara dak sendakba nung June ita mezüngbuba tenokdangba agütsüogo. Parnoki SAF den sendaka aliba telok ana aser RSF den sendaka aliba telok ana nem tenokdangba agütsü liasü.

SAF aser RSF na ita aika mangatettep adoka aruba sülen April ita tom nungi rara tenzük aser mangatettep ya tesashiba kümyonga ao aser iba ajanga nisung meyirejang aika tepsetogo aser nisung aika yirusüogo.

Jeddah nung ceasefire atema aiben mulungtepogo ajisüaka telok anapronglai mulungtepba ama inyaksangshi masür aser ibayongji teyongtsü ia jembishiner Saudi Arabia aser US nati taoba ita sensaksem makatsü asoshi telemtetba agia liasü.

(Maneni tapak 8 nung...)

## Pelaba Lemsateper



Onoki teti meima alila ojala Late. Longertula ali wadang ajak tembanger onok rongjenseta nüktzü yima toktsür kodanga meshilangba limai aodang yimtsür yimer, kiyonger, tembar tajungtem, ana aser talang nungi onok lenmang balala nung yaria mangyim jashi lemsateper ajak dang pelaba lemsateper. Onoki kecha meyipa magütsütetaka nenok temeim mapa onoki kodanga mamatsü. Asen teyanglur Tsüngremi nenok mapa tajung asoshi maneni moajangma.

~ Temeim, Kinungbu, chirnurtem, semchirtem & kinungertem

### Office of the Kohima Longjanglar Telongjem Kohima Nagaland

#### Tenüngsang Agütsür

Kohima Longjanglar Telongjem ajanga Dr. Anungla Pongener Rev. Sentisashi Aier kinungtsü aser Wt. Ngangnen Pongen aser Asür Wt. Alemla Longchar jala -i Nagaland University Lumami nungi "Diversity and Nutritional Status of Certain Edible Insects in Nagaland" nung Doctor of Philosophy (Ph. D) in Zoology ngutetba asoshi LA nem konang nüngsang aser tutushi tulu agütsür. Asen Teyanglur Tsüngremi la taküm aser wadang maneni moajangma.



Sd/-  
Lipokmenla Imsong  
Tir, KLT

Sd/-  
Temsungla Jamir  
Tezulula, KLT

### Office of the Meyilong VDB Women Konang Tetushi Agütsür

Wb. Toshilemba aser Wt. Takolemla na jabaso Sb. Yangersenba T. Jamir, NPSC tatidang nung Lecturer in Mathematics under Technical Education jenjang ngutetba asoshi Meyilong VDB-tsüri tenüngsang aser tetushi agütsür.

Asen Teyanglur Tsüngremi ne taküm aser wadang ajak nung maneni takokba moajangma ta sarasademsür.



Sd/-  
Wt. Temsukala  
President

Sd/-  
Wt. Aosangla  
Secretary

### Office of the KOHIMA MONGSENYIMTI LONGJAKREP JAMIR KIDONG Kohima : Nagaland

#### TENÜNGSANG AGÜTSÜR

Kohima Mongsenyimti Longjakrep Jamir Kidong nungi Nagaland Staff Selection Board (NSSB) Exam 2023 nung shirnokisa takok tulu ngutetogo nenok ajak nem asen kidongi tenüngsang aser tetushi konang agütsür.

- 1) **Miss Asenla Jamir**, D/o. Mr. Repanungsang Jamir aser Mrs. Tolapokla Ozukum. Lai Nagaland Information Commissioner Office nung Directorate LDA Cum-Computer Assistant mapa angu.
- 2) **Temjennangtet Jamir**, S/o. Mr. Tsuktizulu Jamir aser Mrs. Chubamenla Ozukum. Pai Environment, Forest & Climate Change Department nung Dist. LDA cum-Computer Assistant mapa angu.
- 3) **Chetenlemba Jamir**, S/o. Tsuktikumzuk Jamir aser Mrs. Temsüenla Ozukum. Pai Public Health Engineering Department nung Dist. LDA cum-Computer Assistant mapa angu. Tarutsü anogotem nung nenok jenjang balala nung lia aodang Govt. aser nübor tenzükba mapa nung Tsüngremi nenok wadang maneni moajangma.

Sd/-  
Sentikazung Jamir  
President, KMLJK

Sd/-  
Imnalepzung Jamir  
Secretary, KMLJK

## Prayuth Chan-ocha politics nungi anisüngzük

**Bangkok, Chiteni/July 12 (Agencies):** Küm toku tejakdang election ajanga shiba sorkar atsüngdoksang aser iba sülen Thailand nung yimsü süa arusang army tekolakba Prayuth Chan-ocha politics nungi anisüngzük ta sangdongogo.

General Prayuth ya May ita general election nung conservative political party tasen ka atema ato kilonser

inyaktsü atema candidate ka ama toktepa liasü, saka parliament nung menden 500 aliba nungi menden 36 nung dang takok ngua liasü.

2014 küm May 22 nü pai tasa kanga junga yanglur mitkar tashi amshia sorkar atsüngdok aser pa ya o indang-indanga jembir aser ultra-royalist army commander ka liasü.

(Maneni tapak 8 nung...)

## 1buba Summer Badminton Coaching Camp tenzükogo



**Dimapur, Chiteni/July 12 (TYO):** Padukone Sports Management Pvt Ltd, Bangalore den longjemer Abeio Kire & Angam Shaiza nungeri ayongzükba 1buba Summer Badminton Coaching Camp July 11 nü Chief Minister, Neiphiu Rio-i tenzüksüogo.

Iba camp ya Vidhya Bhawan Higher Secondary School, Kuda Village, Dimapur nung agidaki.

Camp lapokba sentong nung Chief Minister Neiphiu Rio alakteta jaoker liasü aser Director of Padukone Sports Management, Bengaluru ngutetsang aser director Prakash Padukone tetushi tejaoker liasü.

Sentong nung o jembiba mapang Neiphiu Rio-i, saisapong ajanga kinük kisang ajak nungi tanur aser tain ajak longjemdaksür, ta ashi. Paisa,

Northeastern state tem aser talisa Nagaland nung iba asaya ajungkettsü atema tejangraba sayuba atema Prakash Padukone dang kanga pelaba lemsatep.

CM-isa, Nagaland nung asaya kar atema internship agütsüogo kong Badminton asaya ya-a ka lir ta shia sentepa aliba lokti dang Northeast games aser National games ayongzükba asayatsü ayongzük. Rio-isa, state-i saisapong nung infrastructure tapu ajak renemdar ta ashiba den pai iba coaching campaign atema asayar 10 sponsor asütsü ta ashi.

Kasa mapang nung Padukone-i o tatsüka jembiba mapang, Nagaland nung aliba nürburtemi pa kanga pelashishia agizükba atema pelaba lemsatep aser coaching camp nung shilem agitsü atema asayartem aika adenshiba atema kanga

pelaba lemsatepba den iba ajanga iba tesem iba badminton asaya kanga sapua asayaba sayur ta ashi.

Paisa, nürburtem aikati badminton asaya ya professional akümtsüba atema masü saka temang anema alitsü asoshi asayaba reprangtetba lemsatep. Nüngtugu badminton asayar yagisa, Northeast nem teyari agütsütsü asoshi talang ka nung janra liasü ta ashiba den iba ya tetenzük dang ta ashi.

Padukone-i ashiba agi, Northeast nung sempet tajung aketba badminton asayartem lir aser pai badminton asayar tajungtem temaba jenjangi ajungkettsü atema coaching sponsor asütsü atema teyari agütsütsü ta ashi. Maneni pai national aser international atema asayar 10 sponsor asütsü tenangzükba agütsü.

## BAM-i coaching camp atema jaoker

**Dimapur, Chiteni/July 12 (TYO):** Boxing Association Mokokchung (BAM)-i ayongzükba arishi küm 5 nungi 16 tsüngda aliba Boxing asayatsü jangraba asayartem atema coaching camp ka ayongzükba akatsü sentong aliba metetdaksüogo. Iba camp ta tetsür aser tebur naprongla atema asütsü.

Iba camp ya July 19 nungi 29 tashi Multi-Purpose Indoor Stadium, Mokokchung nung akatsü renema lir.

Iba dak sendakba nung BAM-i tejangrar ajak jaokogo. Camp nung shilem agitsü atema Form ya Kadak Chai, MTBA Basement, Mokokchung nung angutsü, ta kasa sangdong ajanga metetdaksü.

## 33rd Nagaland Taekwondo championship nung asayar 252-i shilem agidar



**Kohima, Chiteni/July 12 (TYO):** Nagaland Taekwondo Association (NTA)-i ayongzükba D. Khel, Kohima Village kübok Pele Khezhe Stadium nung asaya aliba 33buba Nagaland State Taekwondo Championship nung district 9 aser department 2 nungi asayar 252-i shilem agidar.

Asayamung lapokba sentong nung alakteta jaoker ama o jembiba mapang CO 1st Assam Rifles, Col. SBB Sharma-i, lanurtem nem parnok sempet sayatsü aser jenjang temabai atutsü atema sabang agütsüba atema NTA nem tenüngsang agütsü.

Taekwondo ya Olympics densema international arena nung jenjang ajak nung kanga tongibang kümogo, ta pai ashi.

Northeast ya saisapong powerhouse ka lir aser lanurtem dak contact sports asayatsü atema mezüng nungi sempet keter lir, ta paisa shisem.

Iba dak sendakba nung CO-i, lanurtem dang parnok sempet arangtetsütsü ajita asünungdang parnoki shimba asaya ya professional ka ama asayatetsü ta ashi.

Paisa, asayamung nung

shilem agia aliba tetsürtem nem tenüngsang agütsü aser parnoki tarutsü nung takok tajungba nguteta aotsü imlaba lemsatep.

State level asayamung ka tang teyangludak aliba stadium ka nung facility shidak melei asayaba indang asayamung nung shilem agirtemi ashishiba agizükba NTA tir Pele Khezhe-i ashiba agi, iba stadium ya Taekwondo family indang lir aser sorkari senotsü peria magütsü yanglur.

Paisa, centre aser state sorkari NTA nem teyari agütsü tarutsü nungbo stadium nung facility tajungba amenoktsü imlaba lemsatepa liasü.

Asayamung lapokba sentong ya NTA secretary Neitho Kuotsu lenisüba nung agi aser Master Moon Thabah-i sarasadema liasü.

Iba asayamung nung Kohima, Dimapur, Chumoukedima, Wokha, Shamator, Phek, Kiphire, Peren, Tuensang districts aser ano Youth Resources & Sports aser Nagaland Police nungi asayartemi shilem agidar.

Iba asayamung ya Brehostibarnü tembangtsü aser asayamung shibangba sentong nung YRS Director tetushi tejaoker asütsü.

## UK-i Sudan nunger sepai lenirtem...

Army den sendaktepa aliba Sudan indang foreign ministry-i Mongolbarnü, East African regional body; Intergovernmental Authority on Development (IGAD)-i regional summit ka aser regional peacekeeping force ka yoktsü atema benokba magizüki liasü.

Ajisüaka Sudan indang foreign ministry-i Egypt-i ayongzükba akatsü aliba summit bo pelashishia agizükogo, koba RSF den masü saka army den

tali tajungba sendaktepa lir. Iba summit ya iba hopta tatem agitsü lir.

Kasa mapang nung Sudan nung telok ana tsüngda manenei raratepdar aser talisa anüolen Darfur tesem nung kanga mejungi raratepdar, kong kin o kin na maneni raratepdar aser RSF-i teyari agütsüba Arab kin temi African Masalit lokti nungi nürburtem maka arudar.

International Organization for Migration (IOM)-i Mongolbarnü

(Tapak 7 nungi...)

ashiba agi, iba mangatettep ajanga nisung million asem tema dak kongshiogo.

UN-i teyari agütsüba lokti tentet yagi ashiba agi, Sudan telung nung nisung million 2.4 dak tema pei talidak ki toktsür jenshiogo aser nisung 730,000 dak tema kidanger linüktemi jenshiogo.

Nürburtem ya timba linük yimtiba Khartoum aser Darfur nungi jenshiogo, ta IOM-sai metetdaksü.

## Prayuth Chan-ocha politics...

Aji masüandang ano küm ti jakdang pai mitkar tashi amshia sorkar atsüngdokba mapang ama masü pa yimsüsüba nung ali aser ato kilonser mapa agütsü.

Pa indang kümsük ya khen atema dang lir ta nangzükaka iba sülen pa ato kilonser mapa maneni inyaka Thailand indang yimten inyakyim tashi melenshitsu.

Pa indang military sorkari 2017 küm constitution tasen ka yanglua democracy aruaka mitkar leniri senate nung menden 250 pai shimsü tashi

agütsü.

Tanüa senate nung Gen Prayuth ama conservative royalist aika lir aser tawa agiba election nung menden timba ngutetba reformist coalition nokdangtsü tashi lir.

Gen Prayuth ya tesashi aser mela-mela ain adokba lenir ka liasü aser osangbener temi pa dang asüngdangyaba yimya memetet mapang kabo asayamenüa tepsettsü amokmerena liasü.

Pa ya nisung ka kijai yimsü sür amabo masü saka par sorkari parnok anemer nem

(Tapak 7 nungi...)

tatok magütsü aser nisung noklang aika nem temerenshi agütsü aser tepuokdak ayu.

Thai nunger nisung tain aika asoshi Gen Prayuth ya nüngtugu liasü, saka mitkari yimsü asüba anema lanur temi longkak aitba mapang pa dak tenük yok.

Pai Thailand indang rongsenketzung asentenshi marudaktsütet aser par administration nung ochimashi liasü, anungji lanur temi kumtetba Move Forward Party ajanga taoba election nung mezüng jenjang ngutet.

## World rankings nung Lakshya Sen 12bubai tuogo

**New Delhi, Chiteni/July 12 (Agencies):** Canada Open akokba sülen India nunger badminton asayar Lakshya Sen Mongolbarnü sayaba BWF world rankings nung jenjang tenet tejakdangi tua tang 12buba nung lir.

Arishi küm 21 tain asayar yagi Deobarnü Calgary nung Canada Open tebur kija asaya final nung kanga junga asayateta All England champion Li Shi Feng 21-18, 22-20 agi koka BWF Super 500 title tanabuba benogo.

Point 54,901 nguteta jenjang 12bubai atuba sülen Sen ya India nunger asayartem rongnungi HS

Prannoy sülen tanabuba jenjang nung lir, shiba jenjang ka asepsüka lua tang tekububa nung lir. Mongolbarnü sayaba ranking nung Sen ajak dang nungi jenjang timba tejakdangi tua liasü.

Kasa mapang nung Feng-a jenjang asem tejakdangi tua tang tenetbuba nung lir.

Teburtem asayartem rongnungi Denmark nunger asayar Viktor Axelsen maneni temaba jenjang nung lir aser pa sülen tanabuba nung Indonesia nunger asayar Anthony Sinisuka Ginting aser tasembuba nung Japan nunger asayar Kodai Naraoka lir.

**BILEMDANGANG**

"Anogoshia ya tetenzük tasen ka lir."